

Creidim mar chreideas an eaglais

[Mac Cionnaith, L. *Dioghluid Dána*, Dublin, 1938, poem 15]

1 Creidim mar chreideas an eaglais;
a fhir nach leanann lorg Dé,
seol do mheanmain go múr nimhe,
meabhraigh do rún cridhe an chré.

2 Do bhíodhbhaidh ó bheid 'gud leanmhain
go lá an bháis - ní beag an ruaig -
ar a roimhhead théid i dtarbha
ná léig coimhhead th'anma uaid.

3 Cré na n-asbal an t-iúl fíre
ar feadh do laoi ná léig thort;
maith an leigheas í ar an ainbhios,
is í cheileas t'aimhleas ort.

4 Gurab i n-aoinDia a-tá an Tríonóid
tuig, a dhuine, a-deir an chré;
creid uaim gurab í do riaghail,
ná bí ag buain re diamhair nDé.

5 I nDia Athar is eadh chreidim;
is cóir adhradh don iúl ghlan
más ál géarachadh an ghrádha
grádh m'éanAthar dála dhamh.

6 'N-a dhiaidh do chruthuigh an chruinne,
do chum neamh - gá neart as mhó?
a ndubhart do dhearbh an leabhar,
sealbh 'n-a chumhacht dleaghar dhó.

7 Creidim i n-éanmhac an Athar
Íosa Críosa ór ghein gach maith
go mbí re ngach duine dín-ne;
don uile is rí fíre an flaith.

8 Gabhais toircheas ón treas phearsain;
a pór na ngrás do ghein sé
gan fhear do bhuain ris an mbanóigh;
ní fuair bean anóir mar é.

9 Druim ar tosach tug re a chineadh
ar cóir nDé go ndeachaidh brat;
tug a aghaidh res an uile
an adhaigh rug Muire mac.

10 Fuair fa Phons Píoláid páis croiche,
cáin an chroinn do chúitigh sí;
gur íoc a bhás coir a chloinne
toil na ngrás do-roinne an Rí.

11 Do luigh san uaigh, do airg Ifreann,
do éirigh aisde an treas tráth;
dlighidh seadh do chur sa chreideamh,
a dhul ar neamh creideadh cách.

12 A Athair na n-uile chumhacht
- ní ceannas nar chúitigh sé -
an fáidh ag a bhfuil ar dtreise.
do shuidh dod láimh dheis-se, a Dé.

13 Béaraidh an lá bhias 'n-a bhreitheamh
breath na marbh is breath na mbeo;
gach neach le ngabhair a ghrása
raghaidh breath an lá-sa leo.

14 Creidim sa Sbiorad naomh neamhdha
do-ní inneall don iúl chlaon;
a ionad gomadh hé an cridhe
Sbiorad Dé nimhe na naomh

15 An eaglas Chatoilgeach chreidim
cia agaibh nachar oil sí?
olc bean fa dalta do dhamnadh;
sreabh glanta na n-anman í.

16 [...] ceangladh cumann
a gcuing chrábhaidh ná cuir díot;
do-bhéara an flaith duid, a dhuine,
cuid dá maith uile 'n-a íoc.

17 Dá mbeath an aithrighe iomlán
ar mh'anmain ní fhúigfeadh sal;
gabhar síodh ar son an pheacaidh
a chor dhíom ní deacair dhamh.

18 I bParrthas nó i bpianaibh Ifrinn
d'éis na breithe beid 'n-a ndís;
rachaidh fan anmain uair eile
truail don talmhain reimhe a-rís.

19 Ní thuigid mar táid gá mealladh;
mairg do thréigfeadh teach na ngrás
ar sheal ngearr do ghlóir an bheatha;
do b'fhearr dhóibh beatha gan bhás.

20 Ós éigean dúinn dul i n-umhla,
d'éisteacht an cheoil a-tá thuas
leag do sheol, a fhir an uabhair;
ceol mar sin ní chualaidh cluas.

21 Do na lochtaibh nochar leigheas
i ló meadhaighthe mhóir Dé
- ní céaltar an locht as lugha -
corp dá ndéantar crumha is cré. Cre.

Nír chreid riamh go raibhe an saoghal
San Froinnséis ler fuilngeadh broid
acht mar thuile ag teacht re fánaidh;
tearc duine crábhaidh do chroid. Creidim.